

մարտիկների ու դործիչների վերջին մասը և կառավարութիւնը անցան փրփրայոյց Արաքսը՝ տանելով իրենց հետ Հայաստանի անկախութեան դրօշը, Հայաստանի պետականութեան գաղափարը:

Սկսուում էր անկախութեան պայքարի մի նոր շրջան:

\*

Թիւրքերն ու բուլղարները հասան իրենց նպատակին. Սևրի դաշնագիրը դարձաւ անպէտք թղթի կտոր: Երկու տարի յետոյ, Լոզանում, հաւաքւեցին Սևրի գերեզմանափորները: Իմպերիալիստական շնագայլերի ժողովին եկել էին աղերսելու և հայերը — Հ.Հ.Պատուիրակութիւնը յանձին Ա. Ահարոնեանի ու Ա. Խատիսեանի, Ազգ.Պատուիրակութեան նոր նախագահ Գ. Նորատունկեանը, բազմաթիւ հայասէրներ՝ զւիցերացի Դը Մորգիէ, Քրաֆթ-Ֆոնար, ամերիկացիներ, անգլիացիներ, բելգիացիներ, Ֆրանսացիներ, սկանդինացիներ: Երկու հարիւր հազար ամերիկեան եկեղեցիներ, Եւրոպայի մտաւորականութեան ընտրանին, աշխարհի առաջաւոր մտքերը դիմում արին: Հայ ներկայացուցիչները գերմարդկային ճիգ թափեցին: Ամէն ինչ անցաւ իզուր...

Թիւրքը մենակ չէր Լոզանում. նրա յետևը կանգնած էր Մոսկւան. «Սորհրդային Ռուսաստանի ուրւականը սաւառնում էր Լոզանի խորհրդա-ժողովի կանաչ սեղանի վրա, յայտարարեց Չիչերինը, և հէնց նա էր, որ խանգարում էր մեծ պետութիւններին յարձակել ու ճզմել փոքրիկ Թիւրքիան»:\*) Սորհրդային Ռուսաստանը ոչ միայն չխանդարեց, այլ և օգնեց, որ Թիւրքիան յարձակւի ու ճզմէ փոքրիկ Հայաստանը:

Հայաստանն ու հայկական հարցը Լոզանում էլ սոսկ գործիք եղան մեծ պետութիւնների ձեռքին. անգլիացիների համար նա ազուր զէնք էր Մոսուլի խնդիրը կարգադրելու համար, Ֆրանսացիների ձեռքին՝ կտրոնների ապահովութեան միջոց: Անգամ «անշահախնդիր» և «իդէալիստ» Ամերիկան հայկական մուրհակով փորձեց ապահովել իր նեղ, եսական շահերը և օգոս. 6-ին, Ուշիում, բարեկամութեան դաշնագիր ստորագրեց Թիւրքիայի հետ\*\*):

1923թ. յուլ. 24-ին ստորագրւեց Լոզանի դաշնագիրը: Բրեստ—Լիտովսկից յետոյ ամենախայտառակ դաշնագիրն էր այդ, որ ստորագրուում էր պետութիւնների միջև: Դաշնակիցների յայտարարած սկզբունքներից և ո՛չ մէկը չէր պահպանւած: Սևրի դաշնագրի և ո՛չ մի կէտ չէր մնացել: Կատարեալ անձնատուութիւն դաշնակիցների կողմից: Լոզանի դաշնագրում յիշատակութիւն չկար և Հայաստանի ու հայկական հարցի մասին: Կարծես թէ հայկական խնդիր բնաւ գոյութիւն ունեցած չլինէր: Չարաշուք անտեսում, որ ահարկու ուժգնութեամբ հարւածեց ամենքին՝ բոլոր հայերին

\*) «Заря Востока», 6 ноября, 1927г.

\*\*) Այս դաշնագրի դէմ էր, որ Հայաստանի Անկախութեան կոմիտէն Զ. Զեբարդի ու Վ. Գարտաշեանի ղեկավարութեամբ ուժգին պայքար մղեց և տապալեց նրան. 1927թ. յուն. 18-ին Մերակոյտը 50 քվով 34-ի դէմ մերժեց նրա վաներացումը: